

Pronto ta cuminsa cu renobacion di plasa dilanti Corte di Husticia

ORANJESTAD – Oficina di Monumento cu orguyo ta informa cu otro proyecto di Gabinete Mike Eman II, ta inicia dialuna awor, 13 di januari, 2014. Ta trata di renobacion di e plasa dilanti edificio di Corte, cual proyecto ta bou guia di Ministerio di Infraestructura, dirigi pa Min-

ister Benny Sevinger. Na fin di aña 2013 a tuma luga destaho publico pa renobacion di e plasa Willem de Zwijger. Na e destaho aki varios compania di construccion a participa. E compania cu a gana e destaho pa e proyecto aki, tabata Bohama, segun a wordo informa door



di sra. Yvonne Webb, directora di Oficina di Monumento. “Nos ta masha agradecido na Minister Sevinger kende a deposita su confiansa den nos ekipo di Oficina di Monumento pa realisacion 100% di e proyecto aki,” sra. Webb hopi entusiasmo a comenta. Esaki ta un di e proyectonan cu e Oficina a prepara for di cuminsamento te na final, incluyendo supervision di construccion di e obra ora cu e cuminsa dialuna awor. Inicio di e proyecto aki ta encera cu e parti unda lo bay ta trahando ta wordo cera. Corte sinembargo lo keda accesibel via su entrada normal, aunke e espacio lo ta limita. Pa e motibo aki Oficina di Monumento ta pidi comprension di tanto personal di Corte como publico cu ta bishita e instalacionnan di Corte pa e periodo di duracion di e trabounan aki. Tambe ta haci apelacion na automobilistanan pa tene bon cuenta na momento

cu circula den e area aki, ya cu e trabounan lo por trece un poco di stagnacion den e trafico. E proyecto di renobacion di e plasa, cu ta conta cu un inversion di rond di un miyon florin, ta programa pa keda cla na mita di 2014. Yvonne Webb, directora di Oficina di Monumento, a splica cu e plenchi aki ta e ultimo di e cinco proyectonan cu tabatin relaciona cu renobacion y ampliacion di edificio di Corte di Husticia. E arkitecto encarga tabata Daphne Every mientras cu Astrid Maduro a pinta tur e mapanan di e proyecto. Den e diseño, señora Webb a splica, a tene cuenta cu tur aspecto mester cuadro cu e edificio historico di Corte. Asina por ehempel lo tin suficiente iluminacion, pero tur e luznan ta instala bou di e matanan, dunando un dimension diferente cu ora pone palonan di luz mes. “A haci esaki pasobra e structu-

ra di Corte ta uno clasico y protegi, pa cual no por pone cualkier cos dilanti e monumento protegi aki.” Den e diseñonan a mantene e forma simetrico cu e plasa tin cu e edificio di Corte, pero tambe e obelisk cu tin eyriba a wordo incorpora den e diseñonan. Mientras cu den e diseño original tin bakinan, den esun realisa awo a kita nan pa habri mas espacio pa planta mata, dunando e plaza un aire mas puro y mas agradabel. E proyecto aki ta cambia aspecto di Corte, ya cu e plenchi ta yega te na e prome trapi di entrada pa edificio di Corte. Esaki ta nifica cu no por staciona auto mas dilanti e edificio ey. “E ta bay ta un espacio unda hendenan por sinta tambe y lo refleha y inspira bunitesa.” Mester remarca cu e nomber di e plenchi aki, Willem de Zwijger, ta data for di tempo cu a construi e edificio original. □